

慎思錄

冊數	記號	番號	部類	中學	洪習縣尋常
六	一		雜	書	

919.5

347

Vol 1

益軒貝原先生著

慎思錄

神京 書堂 瑞錦堂 藏版

益軒先生著
學海叢書印

慎思錄自叙

古之聖賢說思之有功于問學不可勝言
夫子以學與思相對說而其功相等何也
蓋學貴自得苟不慎思則雖博學審問不
能融會貫通而得之於己故程子曰爲學
之道必本於思思則得之不思則不得然
則思之功其義大矣哉余自十四五歲頗

知聖學之可尚而好誦讀經傳自幼至老
晨昏不廢妄意有欲自得之志且稟性拙
鈍而闇機務是以無他事縈念嘗以講學
之事爲當務之急故平生不喜作拙詞泥
訓詁而作無益曠學功焉居間讀書之時
每有心生疑惑則欲開通而恭默思之思
之弗得弗措精氣之極似有鬼神教之於

此乎每有會心則記之策積歲而成編雖
僭忘之罪固不可逃庶乎愚者千慮有一
得嗚呼老懶之至不能修改舛訛自以爲
憾而已然鄙陋之作奚待後世之子雲乎
故非敢欲傳諸達識將以備衰殘之廢忘
且以欲遺之後裔而爲家訓云爾

正德甲午立春日

王新甲 筑紫後學八十五翁 貝原篤信書



Vertical columns of faint text, likely bleed-through from the reverse side of the page.

慎思錄卷之一

貝原篤信編錄

人生而不學與不庄同學而不知道與不學同知而不能行與不知同故為人者必不可不學為學者必不可不知道知道者必不可不行知道至難自古英才敦行之士不為不多然知道者鮮矣學問思辨之功所以不可闕也

為學者只要明辨善惡而進善退惡而已矣苟不如此則不足以為學故先須立其基本又守其禁戒基本立而後可進善禁戒行而後可遠惡蓋為學

有大基本謙之謂也。有大禁戒矜之謂也。謙者溫恭自虛，以已知爲未知，以己能爲未能，好問而不自用，不責人而責己。苟如此，則其善將日長。此君子上達之道也。矜者自是、自滿，以未知爲已知，以未能爲己能，好自用而不好問，負其智而不資人，不責己而責人，好勝入而欲上人。苟有勝心如此，則其惡將日至。此小人下達之道也。初學之人不知禁戒，不立其基本，則以所學誇己，謾入學者。苟有這一點勝心，則雖通經傳，好理學，欲求益反自損其天性，日陷于下達，不如無學也。愚謂謙與

矜者爲己爲人，爲善爲惡，爲君子爲小人之所由分也。故初學之人先須立其基本，守其禁戒，而後爲學也。

子分輩爲學之道，須以論語孔子所教爲法，是聖門之懿訓，萬世之模範也。蓋聖人者，百世之師，天下之標準也。其言乃萬世之信也。學者所可仰慕而循守者，豈復有以加於此乎？學者須必由是而學焉，是爲學問之成法。如讀書記誦，固是子分當務之事，然不可爲子分一義。苟篤行於子分謹信等事，而有餘力，則可以讀書講習，博學審問，爲勤須講。

究義理開發聰明自初學至成德而為學之法
須如此若未能以孝弟忠信為善力行立基本徒
以博覽記誦為急務是後世俗學口耳之習耳非
聖門教人之道也

子身居家則順父母宜兄弟敦親戚在外則泛愛衆
親仁凡接人倫平心和氣慈愛恭敬懲忿窒慾自
反責己有忍有容而居常以為善為樂此學者自
初學至終身為日用當務之工夫一生之事業先
須於此立基本

為學之道以為仁為本以忠信為主以孝弟為先以
博文約禮為勤以為君子為志是孔門教人之規
模也仁也者何也是為善之揔稱慈愛之理也孟
子以求放心為學問之道求放心者乃求仁也

聖人之教入也在厚人倫厚人倫之道以愛人敬人
為本是愛敬者厚人倫之道也愛敬於父母者又
其本也教幼學之輩先須以愛敬夫溫恭自虛為
子身者所當先服行也是乃接人倫為善之始也
心在隱微之中未有形迹之著操之也難矣發乎情
而後有迹而善惡著矣於此乎可操而存精固氣
而發故正心之道在養氣養氣者動靜語默接人

應事常要和平和平之道所謂在持其志勿暴其氣而已大率日用常行之際修己接人之道以溫恭爲基堯允恭克讓舜溫恭允塞夫子溫良恭謙讓燕居申申夭夭詩曰溫溫恭人惟德之基管子分子職曰溫恭自虛聖賢所行皆是這件事夫人之身心固爲主而氣專用事故七情思慮視聽言動皆氣之所爲不可不養之以節若暴其氣則爲失其道故平生溫恭和平以養氣是即所以養心而養心與養氣非二事也

平心和氣是養身養德之一工夫

養氣而無暴之工夫在溫恭和順從容不迫而不動聲色養氣如此可以不失其樂

溫恭之一字經傳多言之是爲善之初苟不如是則不能爲善接人之道當如是

人氣須是剛不剛則不能擔當義理又須是柔不柔則不能和順義理勿以剛暴其氣勿以柔從俗流須剛柔並行不相悖學者養氣之道須以不剛不柔爲節度是學者之要務也剛者非強暴之謂不屈于欲也仁以爲己任死而後已者剛也柔者非軟弱之謂溫和謹厚能忍者柔也

學者居常須以溫和慈愛為心便是為善之本以仁存心也如嚴毅或武須用之有時非居常之道也朱子曰須是慈祥和厚為本如勇決剛果雖不可無然用之有處所

人心不和平則百般病痛自此起矣學者應事接物皆須要胸裏和平和平則忿厲粗暴之氣自然消除便是無暴其氣之事養氣之工夫也

子之燕居申申如也天天如也蓋欲學聖人者須要從容和樂是儒者平日之氣象宜如此

心體本隱微未著形迹則不可執持矣志是心之所

之氣體之充也人心之動靜無不資氣若暴其氣則志亦難持而心體亦為之動故曰持其志而勿暴其氣此養氣之工夫乃持志存心之道也蓋以養心為主意以和氣為工夫故養心之道在養氣養氣之方以和平無暴為勤此日用常行之緊要為學者之急務然而後之學者不知以之為緊要故為此工夫者極鮮矣今之學者平日之氣象言貌都是暴其氣之事且其接入也一言忤肯一事不合則睚眦發怒厲氣拂戾凡言行以使氣為尚者不可為儒者之氣象明道之接入也一團之和

氣如坐了春風之中是無暴其氣之至也大賢之
氣象學者所當爲則也

人之所以爲人者有禮義也人苟無禮義則與禽獸
何擇禮義之重如此故自初學到成德須以禮義
爲準則不可須臾離也

教學者以日用彝倫之平實切近者爲先焉聖人之
教本自如此是學者易曉易入之道而與異學之
徒浮虛貪高而大言者異矣聖學之訓不要極高
極深蓋高深非所以教初學也聖人之道自是易
簡雖愚夫愚婦易知易行者是下學之事聖人之

本教也若夫極高深者下學之功積久而自然而
得者是上達也蓋下學而上達者爲真知不下學
而欲上達者爲空言此理之所無也

後世學者雖耽嗜讀書而無志知道平生拘章句泥
訓詁而無精明思辨之功故雖治經讀書之日久
不能彷彿知大道之要或爲無用之閑言語爲閑
勞擾而作拙詞勞心費功可謂作無益害有益也
其不進學者宜也哉

爲仁之道在厚人倫而已厚人倫之工夫以慈愛恭
敬謹言力行爲先務以孝弟爲本是日用彝倫之

事最以爲當務之急有餘力則以學文是先德行
後文學古人爲學之道也人倫工夫以善
以仁愛作善爲樂是君子之心雖衆人若有志好善
則其知之行之也各循其生質之分而至之易何
則人性本善好善惡惡是天性之自然者故夫婦
之愚不肖亦可與知能行也凡好善之道其所守
約而所施博施之則悅者衆此可爲要道故爲學
之道唯以爲善爲事而已矣
力行以厚人倫爲道是天理民彝之大節爲日用當
務之急爲學之功須專一乎此文學其餘事也不

可爲先務然有餘力則文學亦可勉勵不可怠廢
蓋學文者所以明力行之道也

學者須以孝弟謹信爲先次以開發於聰明爲當務
之急蓋雖爲學敦篤然偏僻蔽固則塗塞心目而
不能開發於聰明終身由之而不知其道者衆矣
學者必通道而後可爲君子之學故修孝弟忠信之
餘暇須以研究於義理開發於聰明爲務苟不然
則雖博學廣聞經義詳審不能通道徒記誦訓詁
之習而已何以可判斷於天下之事理辨別於天
下之是非而無差失乎且或以雕蟲之文藻飾之

詞爲事雖巧亦何有益于已補于人乎哉

凡爲學焉者將以濟用故學必施於事而後可爲有用之學其曰有用之學何也曰是明人倫施事業修己治人之學也不然則雖了悟於玄理大言說高妙何以於人倫之道而有濟乎可謂無用之學也夫爲學如此則果何有小補于天地之間哉可謂爲無益而害有益也

知道是爲學之主意蓋知道則行道亦在其中矣古人之學知之則必行之非徒知也能知之則無不能行之患不能行者不可爲真知也故爲學可要

知道若不知道不足以爲學知道之難豈吾輩庸人之所容易可得哉然人性本善良良知具矣故道之端緒其小者雖愚夫愚婦可與知學者若真積力久則必有其效是以賢者識其大者不賢者識其小者各隨其識量之大小與其勉學之厚薄而無不可得之理世之學者只耽嗜典籍而無求道之志或雖有求道之志然不知求之之道雖勤經術而刻苦然復拘滯于訓詁而不能自得所以終身不能知也

學將以知道也聖人詢詢垂教可謂至矣盡矣欲使

學者知道也後世學者益多而不能知道者何邪
蓋學者須以立志爲本其所志者何也以知道爲
志也學者雖博聞廣覽然無志于知道而徒以章
句爲勤者其失有三焉曰溺詞章泥訓詁止記誦
此三者之習雖終身讀書然不能知道可謂勞而
無功也且雖有志于求道而無三失然不能知道
者其失亦有四焉苟不專一于聖學則志分于他
岐故迷而不能知道其失一也不博學之則孤陋
寡聞而不能知道其失二也不致思精詳則粗畧
而不能知道其失三也如曲士之束于教則雖爲

學專一然拘泥而不能知道其失四也須無斯數
之失而以爲知道之工夫也
爲學之工夫古人以知爲先者蓋知以開導非先知
之則不能力行先知者知當行之端緒也如事親
者先知溫清定省出必告反必面之法是也非窮
知畢而後方行之之謂也既知其端緒則行之最
爲急矣此乃知行並進之工夫須如此蓋知行二
者如車之兩輪如鳥之兩翼闕一則不可也故學
不要徒知之必要力行二者可以爲學而以行爲
重若不能行之則雖徒知之都無用不可以爲學

是以學焉者知之爲先行之爲重也非行之則不能真知譬如行道路其道路之里程山川之形勢雖有記籍而詳審然非躬親經過則不能諳知其真境故行而後知者真知也

古人之爲學也以知道爲主意是以雖其稟性有利鈍終有自得之功今人之爲學也嗜書博識者往往有之然其所用功止乎訓詁記誦詞章二者之習而不能知道其間復有專嗜經義者然其所講究唯在于章句之間而不能慎思而做致知之工夫雖自以爲道學是亦訓詁之習而已矣夫治經

之道雖辛苦窮年經義頗詳所以終身無自得之效而不能知道也

古之學者下學而上達登高必自卑也蓋學者先於存身忠信日用常行以務實爲本而後學文以明善則知與行並進日新不息用功積久是下學也進而後義理開明德行純熟自然可上達故學者工夫只在下學而已上達者不期然而然自然之效也蓋所知所行早迨而工夫愈平實則所得愈高明所謂下學而上達者須如此苟廢下學而不勤直務上達欲高談性命遠極精妙而好大言快論

此非行遠必自通登高必自卑而循序漸進之道
 便是欲一超直入者此理之必所無也與孔門立
 教之法相乖戾雖未至絕滅人倫是與異學同流
 爾
 致知之工夫自一身之中以至萬物之理不厭煩擾
 講究多則自然豁然有覺悟是格物窮理之工夫
 而其中以當務為急有本末緩急之序不可紊也
 若舍一身所備之道理而不肯欲泛究萬物之理
 此非儒者之學便術者之事也須自本領末自近
 到遠循序而有統紀

人心多蔽塞而有偏執是以暗于自知賢者以下所
 不免也故古人曰知人謂之知自知謂之明夫知
 入固難而自知為最難以為學之方須舍己從
 入虛以受人庶乎無偏曲之弊不然而固陋執滯
 自是不取於人則雖信道為難操心堅終不能知
 於光明正大之道而不免為愚昧之歸哉如此則
 夫豈特害其心術耶抑亦可以發於其政害於其事
 甚矣偏狹固滯之為病也

顏之推曰人生難得勿空過斯言有旨哉蓋羣生之
 中為人為難且不能再生豈可空過此生乎可惜

惺思錄 卷之一
醉生夢死枉過一生也苟為人而不能聞人道雖
長生不死為空過然則為人則須要聞道聞道之
工夫又唯在于能學而已矣

天下之人天為父地為母而為天地之子是以萬物
之中唯人為最貴是所以為靈也夫然故人之於
天地有罔極之恩豈唯稟氣之初資其始生之功
而已乎抑有生之後覆載愛育之恩亦係乎此矣
是故儒者終身之事業皆在事天地而盡其道而
已矣西銘所謂存吾順事沒吾寧之意學者之所
當知也事天地之道如何曰為仁而已矣為仁之

道在存心養性而愛育人物而已蓋吾心性乃天
地之所賦與即仁也存養之而不措也者事天地
之本也且夫天下之人物是天地之所生也天地
愛育於其所生是故君子事天地之道在親親仁
民而愛物而已聖人所以教民以惇五典也且其
餘事又在愛物而已是惇人倫愛萬物者所以奉
若于天地生育之心也然則豈可敢慢惡於人暴
殄於物而乖戾于天地生育之心乎是以愛養於
人物者乃存心養性之功用而為仁之事也是事
天地之道也

西銘以天地為父母以萬物為一體而發明於事天地之道為親切學者須先知此理終身服膺而無失也

學貴自得故非自得則雖記覽廣博經義詳審乃章句之習訓詁之學而已未足以為貴也

恭默思道是所以自得之工夫孟子曰思則得之不思則不得故學者之自得與否者因克念與不克念也思之於學功也其益大乎哉論語曰學而不思則罔聖人以學與思對言者誠有以也

學以知道為本知道非自得則不能也蓋不能自得則雖博古知今不可為知道此學所以貴自得也自得之方以慎思為要所以通精微也故曰思曰睿睿作聖周子曰思者聖功之本而吉凶之機也程子亦曰學本於思蓋自得之方固以博學為先然非慎思則不能默識心通而得之已自得者何也自然得之也所以自得者不急其功不躐其等深造以道用力久而自然得之也不可臆度而強求也又不可偶然而頓悟也

凡接人倫之道以愛敬為心愛敬始乎事親豈啻施於父母而已哉愛則不敢惡於人擴之則至于博

施濟衆仁之行也敬則不敢慢於人擴之則至不
敢侮於鰥寡禮之行也接人之道盡于此而已矣
二者皆日用彝倫之間所可常行而不可須臾離
之道也然愛敬以信爲本苟無信則雖容貊恭謹
言語姍姍亦不足以爲愛敬而已
人之性多偏自非聖人所難免也性之偏處乃過之
所生也故雖賢者不能無過苟不能自脩省則其
言行不過者寡矣且衆人之心多壅蔽而偏狹故
學者貴於多見多聞好問取人聞過納諫不貴徒
執已見而自是

人非聖人誰無過雖有過知之而能改則歸無過故
人有過非所以爲耻苟私意蔽固則雖有過而不
能知之雖知之又不能改所以爲可耻也方其有
過時不可以爲非過而遷護掩藏須直爲已之過
顯揚而速改之然則於其心術也無所分毫損闕
何耻之有子貢所謂君子之過也如日月之食焉
過也人皆見之愛也人皆仰之者此之謂也苟耻
過遂非以爲非吾過而偽飾掩藏則其爲過也益
大而罅漏百出所以甚爲可醜也子夏曰小人之
過也必文者此之謂也

今人之爲學，泥於訓詁者，極破碎支離而不切於窮理。耽於詞章者，務奇巧麗飾而不能就實。貪於博覽者，游蕩汜濫而忘復。諸本襍于異學，者偏僻駁雜而不純。正要之皆足爲學術之累矣。夫爲學之道，須以知道行道爲志，是乃博文約禮之工夫也。苟無二者之工夫，徒以好訓詁詞章博覽偏異爲學，則不可爲儒者之學也。

白虎通曰：三綱者，何謂也？謂君臣父子夫婦也。君爲臣綱，父爲子綱，夫爲妻綱。西山真氏曰：三綱之名始見於此，非漢儒之言。古之遺言也。篤信曰：孔子

說仁之一字，正兼四德。於易說仁與義，孟子說仁義，復兼說仁義禮智。至漢董仲舒曰：仁義禮智信五常之道，王者所當修飭也。五常並舉者，以是爲始，是亦疑非。董子初言古之遺言也。然而信乃仁義禮智之實者，非四德之外別有信。故孟子嘗說仁義禮智說四端。

今之學者，讀書學文之事常多，慎德力行之功常少。故雖文學漸進，然德行之不進也宜矣。且雖文學長進，然不能開明義理者多矣。此皆讀書之人所當耻也。

後世學者之持敬以色莊拘執爲勤自以爲持敬之工夫然以慈愛溫恭忠信好善爲勤者鮮矣故其所行矜已責人刻薄不仁而好誹謗不能反己自厚由務外而不主忠信也苟不主忠信則其主敬者非真此可爲色莊人也

存養省察之工夫爲心學之要務存養二字一程子取於孟子存心養性之言以爲學者平日動靜之際保護於心性之工夫省察二字出乎楚辭九章朱子取之以爲清意初動時辨別理欲之工夫前此經傳之中雖既有此意尚未有此名後世有此

名者蓋自程朱而始是亦有功于聖學也學者不可不知其所以立名之意與其所以用功之道中庸所謂戒慎恐懼者朱子以爲存養之工夫慎獨者朱子以爲省察之工夫都是道也者不可須臾離之事也

存養是常時存養心性之工夫貫動靜自至靜無事之中至應事接物之時無時而不然全功也省察是動時之事一念既生七情方發之時省察其善惡而審其幾也然且有克治之工夫是省察之後窒其所發之人欲而克治之也是亦爲動時之

事存養譬如平時穀肉保養省察如問症診脉而知病之所在也克治如以鍼灸藥石攻病也三者皆存心養性之工夫而省察克治亦存養中緊要之工夫也

舜詢於四岳闢四門明四目達四聰如此而可旁達天下之聰明廣視聽於四方以決天下之壅蔽蓋天下至大唯恐下情不通聞見有壅蔽然以四方之目爲目則無所不視以四方之耳爲耳則無所不聽以四方之心爲心則無所不通舜之太智舍已從人取於人以爲善如此學者之於道亦當以

是爲法蓋天地萬物之理天下古今之事可謂廣大矣須開濶其心胸廣博其聞見以取天下古今之善明天地萬物之理苟負一己之視聽而自是不取於人則壅塞而不通偏陋而不大所謂自用則小也不明孰甚焉以如此偏狹蔽固之見欲窮於天地萬物天下古今無窮之道理不亦難乎

人生不滿百歲豈可放蕩曠日而不惜空過斯生耶古人曰天地有萬古此身不再得人生只百年此日最易過幸生其間者不可不知有生之樂又不可不懷虛生之憂此言可時省

或疑世間讀書之人多矣往往無益于身心者何也
曰爲學在立志苟無志之人雖廣覽博聞無益于
已然志者由已而所有非管別人須自己奮起故
皮白休云聖人與人道不能與人志夫六經四書
所載者聖人之道也六經四書之文字者聖人之
言也有志者誦其言而求其道所以有益也無志
者誦其言而忘其道所以無益也凡學焉者貴躬
行心得之苟無志求聖人之道則不能躬行心得
然則雖博學強記日日說經義奚可有益于其身
乎

學者之講學勤業皆以時日之力故志士惜日短今
日不重來是以學者最要惜時自今人作無益害
有益而廢時曠日可惜哉

辭尚體要蓋發言須要主意專一而不支論說明詳
而不煩也苟言談繁重且冗長則無要用之語而
意旨不明聞焉者厭倦是輕本幹而重枝葉可爲
發言之戒也

志於道者須誠敬以守其志不然則流蕩放荒而忘
道終亦必凶而已矣

今之學者大率責人之不善之意思常多而責己之

今不善之意思常少此謂以聖賢律人以衆人待已是以爲學者所以終無益于已也

敬者戒慎恐懼之謂非把捉強持之謂也若操心強爲把捉是爲助長之病所謂拘捉則難入也其弊或流而爲色莊人者多矣不可爲敬也今執敬之人動以敬爲束縛強持之事非聖賢言敬之本旨精然一於和而安排布置不節之以禮者亦去敬彌遠矣

胡敬齋說敬字一節甚佳曰朱子說畏字是敬之正學意篤信曰敬字合於程子謝上蔡尹和靖朱子之

說而見之則意義始明備矣敬是畏字之意畏則自然主一而無適且常惺惺收斂不容一物此數說皆是畏字中所在畏只是戰戰兢兢小心翼翼之意蓋以畏字說敬是朱子晚年之說可爲敬之正義後世學者不知敬之義偏執於敬而被束縛是以蔽固深矣所以去敬益遠也

孟子曰不仁者可與言哉安其危而利其菑樂其所以仁者蓋不仁者必不知何則不仁之人失其本心而是非之心昏矣故雖聞忠言不信因聽之不聽也此不可與言也因其無知故非帝不能知義

理之可樂雖危菑之可懼亦不能知是以安其危而利其菑荒淫暴虐樂於所以致敗亡者雖危菑既至亦不悟終以取敗亡可謂昏愚之甚也國語古人謂之人覓天禍而不弭也孟子所謂樂其所以亡者也尹起辛曰天資好亂之人不至於覆亡不止亦此意也古來不仁之人往往皆如此嗚呼可哀哉

不知之人豈唯不能知義理之可爲而已乎抑雖利害亦不能知是以背仁義行貪暴而不止至敗家滅身而不顧可悲哉此安其危而利其菑也

劉敞弟子記曰擇術然後學之擇師然後傳之擇交然後親之擇君然後事之竊謂此言可謂至論也蓋不擇術而學則迷左道與俗學而終身不悟陷身於非道不擇師而傳則投身於非人而不能聞正道勞而無功不擇交而親則陷身於非義而不覺無益而有損不擇君而事則喪身於無道臨危亂而有悔嗚呼不擇此四者終歸于愚學者之所當審擇也孔子以不擇里爲不知夫里俗之於吾身其所關係比此四者爲遠猶且貴擇之而况於此四者可不擇乎

讀六經語孟以宋儒本註爲先固善然古註疏亦不可廢朱子曰漢魏諸儒正音讀通訓詁考制度辨名物其功博矣學者苟不先涉其流則亦何以用其力於此朱子於四書詩易既作傳註而其言如此然則古注疏亦不可不考夫朱子之作傳註義理精當固不待古注疏然如訓詁文義名物制度讓于古註疏而不詳解者亦多矣今人之讀經也不考索於古註疏却汲汲貪見於明儒之諸說是舍本初而趨末流也蓋看漢唐諸儒之註疏則得文義之故實而可爲考證者多矣不可廢

仲虺之誥曰克寬克仁彰信兆民六經言仁信始乎此又曰以義制事以禮制心六經言義禮始乎此又曰天乃錫王勇智六經言智勇始乎此湯誥曰惟皇上帝降衷于下民若有恒性克綏厥猷惟后六經言性始乎此大甲曰鬼神無常享享于克誠六經言誠始乎此

學問之要有二在知其所未知行其所已知而已爲學者必欲造道欲造道者貴擇術欲擇術者又必可擇師友師友明良則學術正矣學術正矣而後可造道也苟學術不正則勞心志費日月而終身

無成功或迷于曲徑邪路者多矣一失脚則不能
復于正路故學者須以擇術爲第一事
看史而不專經則其蔽也流蕩而忘返也耽嗜詞章
則心爲之所累可謂玩物喪志也夫詞章之學比
之看史則用心過多其爲蔽也大蓋學者不專一
于義理則其志荒而不能進道程子曰不專一則
不能直遂故爲學之工夫貴精專

學者若於事物之上有未講究則天下之庶務有所
不能察識故雖無私心而事不當理者多矣然天
下之事非一人之所可講究盡只於其切近者精

熟則其餘可以類推况有餘力則又可博講究乎
伊川曰自洒掃應對上而可到聖人之事洒掃應對
者道之粗也聖人之事者道之精也小學之書所
載皆是自粗入精之教也

學者不可因庸人之毀譽而爲喜愠如吾所行之得
失當以聖人之道爲準苟其所行與聖人之道不
背馳雖舉世毀我乃求全之毀也非所以爲愠苟
與聖人之道背馳雖舉世譽我又不虞之譽也非
所以爲喜

大抵道之不明因師道不立也師道之不立豈特師

大之非其人也哉抑亦由弟子之不嚴於師也

讀書之序須從上做下不可從下做上須從本到末不可從末到本蓋從上做下者先看古書而後及近世也從本到末者先治經傳而後及史子也理欲不兩立纔不主乎彼則主乎此是學者之所以常存敬畏而不可須臾離道也

學者雖講習於正學然而理有通塞心有偏正故雖同學之人所見不能無同異是以朋友之議論相與須虛已受人捨其邪取其正辨其異而歸其同苟偏執已見自是自夸強辨好勝之人未足與議也

雖古昔豪傑之士然氣稟多偏故其心術言行又不能咸純粹平正於其學術亦然學者宜取其長處捨其短處採古人之言行者所宜察也

凡讀書窮理者欲博且精博則於天下之理無所不通精則於天下之理無所不明博與精二者備矣而後可為窮理之學是致知之道也嗚呼窮理之學用力久則於天下之理無所不通明其樂不亦大乎

古語云知人謂之知自知謂之明是言自知最難也然知人亦甚難蓋依其知愚奸直邪正隱于其心

曲而不易察也。若夫自知者是吾之心曲所獨知，其是非曲直誠可易明，却爲最難者。何耶？蓋衆人私意蔽固，往往自是，自足以不知爲知之，以未能爲既能，是以自知爲最難。世有自夸之人，是愚之甚者也。何則？自夸者不能自知，不能自知者無照察之明而然也。莊子曰：知其愚者，非大愚；此言却是智者必有仁，仁者必有智，蓋是非之心觸事而發，見與惻隱之心感物而發動，同是本心感通之道理。如針刺爪，抓亦知痛癢，一般故不知者必不仁，忍刻者必不通明。不仁不智俱是本心閉塞而不能

感通也。夫智者必有仁，無仁不足爲智。然智者所得之分數，智多於仁，故稱智者。仁者必有智，無智不能行仁。然仁本心之全德，兼智而在其中矣。其爲人也，仁爲之主，故不稱智者而稱仁者。

道理本自廣大，其粗淺處雖愚夫愚婦可以與知焉。其精深處非知者則不能通徹矣。苟欲知慮精明，雖天資聰敏之人亦非有寡慾養心之助則不能也。

以孝身忠信禮義廉耻慈愛恭敬，日日未干已，自責其不足而不休，是可爲行善焉。以孝身忠信禮義

廉耻慈愛恭敬，日日求于人，責其不足而不休，是
可爲行惡焉。欲知行善與行惡之分，無他求已，與
求人之間也。

朱子曰：君臣是義，合世之人，便易得苟且。故於此說，
忠是就不足處說，胡敬齋曰：朱子曰：忠是就臣所
不足處言之，此記者之誤。蓋忠是臣職當爲篤信，
曰父子兄弟，是天合故，雖庸人鮮有欺，僞君臣朋
友，是人合故，易至苟且自欺。故於此說，忠說信，蓋
就所不足言之，且如夫婦固欲和順，然其親密易
至褻狎，故於此說，別又就所不足言之，况君臣勢

位懸隔，故其情意疎遠，疎遠者，易至欺罔，是臣之
常不足處，便是臣之所當盡也。苟不就所不足說，
而徒謂忠是臣職當爲，則忠是實心，凡五品之道，
皆不可闕，何可以之獨施事君乎？朱子所謂忠是
就臣所不足處言之，說未可以爲非。胡氏之說，反
覺不是。

君子棄其財而救貧窮者，非不愛其財，愛其財甚而
欲用之德義也。故能賑恤貧窮者，視其平日用財，
必儉約不妄費之士也。不能救貧窮者，必驕奢妄
費之人也。

水靜則清明燭鬚眉其平中准大匠取法焉人心靜而後能慮慮而後能得益能慮者明之所生也能得者即知得也故非靜則不能生明

伊訓曰居上克明爲下克忠言人君之德以明爲主不明則不能知人官人旌別淑慝其所信用者姦佞讒邪之人而已雖欲爲治而可得乎故克明之要在知人而已人臣之德以忠爲主忠者盡已致誠而不欺之謂不忠則不能薦賢納諫而正其君唯以固寵貪祿爲志何以有益于國家乎夫人君之不明莫大於不知人人臣之不忠莫大於蔽賢

明之反爲暗忠之反爲欺君臣之不德以此爲大古人之爲學也所以道明德立者何也因其用心之精也今人之爲學也所以道不明德不立者何也因其用心粗也蓋用心精則其察理也密故其道明焉其力行也慎故其德立焉用心粗者反此程子以爲顏子所以未至聖人者其心麤夫以顏子之聰明純粹尚且如此况凡學者豈可不用心於此乎至技藝亦然其所以有良拙者由用心之有精粗而已本邦之人古來文學道藝所以不及中華者亦因傷于粗也

常人之議事多是偏於一理主於一利故所思不能周悉往往偏僻蔽固自以爲是是以所見所行中理者寡矣是猶不見四方而唯知於一隅也

夫卦九四象曰聞言不信聽不明也斯言最當體察蓋雖忠告而善導然聞之者不能信是因聞之不明可謂頑愚而難曉也雖言者賢哲難奈之何詩曰誨爾諄諄聽我藐藐者是聰不明也韓子曰傳曰惟善人能受善言謂其聞而改之也是聰之明也薛文清曰稟氣之濁者心不開明善言不能入篤信謂聞善言不能信者是亦稟氣之濁者也世

有剛愎不遜而自許大過者此人必聞言不信是即聰不明者因稟氣之濁也

克慾以剛須如猛將之鏖敵朱子曰克己別無巧法譬如孤軍猝逢強敵只得盡力舍己向前而已尚何問哉此譬最切是可爲克己之良法學者之所宜循守也人能從事於此則何己私之難克之有凡講學之得力者在于克己之私慾與知過而能改不然則雖從事于講學何以爲

天之授人以才學與貨財豈惟厚其人而已哉誠欲以令補衆人之不足者也然則有才學者必教人

而不倦多貨財者可施人而救恤是畏天命而順事之之道也不然則侮背天之命也可不畏乎哉天地雖方于大寒大暑大風大雨迅雷地震大變之時不失其太和是以發育萬物而生理不息人雖方于艱難多事之時窮困危變之時遇橫逆拂戾之事不可忘從容自得隨處而樂之工夫中庸所謂君子素其位而行無入而不自得者也苟不如

此則與天地之和氣不相似厭煩是人之大病是所以人事之廢弛功業之不成也蓋事物之應接雖煩多皆是吾人所當為分內

之事也但循序漸爲則無苦心勞力之患而有果行成事之功程子曰非是事累心却是心累事也朱子曰學者常要親細務莫令心麤此等之言可爲放惰而厭事者之戒今之學者往往有厭煩之病所以終不做事也故呂氏童蒙訓曰鹵莽而厭煩者決無有成之理明費元祿曰耐煩二字最妙能耐煩天下何事不可做此兩言子弟之輩所宜省也

人知其過者寡矣此知過爲難而知過而能改者爲最難故自知過而能改聞過則喜者皆爲可貴耳

義是天下之公利是一己之私公則善而有福私則不善而有禍世人非唯不知義利之可取捨復不能知吉凶禍福之所由起是以徇私背公捨福取禍其終至于敗家滅身而不悟可勝歎哉古人所謂貪天禍而不弭者是也

子弟之輩與放蕩無賴之客往來則為彼被倡誘不陷非僻者鮮矣故教子弟須以擇友為先朱子曰劉元城有謂曰子弟寧可終歲不讀書不可一日近小人此言極有理夫子弟終歲不讀書固可為太不佳然一日近小人則其禍不可量豈終歲不

讀書之比耶然則子弟之交游可不祇懼審擇耶豈啻交友而已耶雖子弟之左右僕從亦不可不釋蓋少年未有定見聞言則易遷儉邪之言僂佞之說易入可不恐哉

學者以志為本無志則雖讀書該博而無益於身非徒無益苟無志者以才能在身自矜侮人則害德莫大焉然有志者或寡矣是以雖天下之讀書者多然有益者甚寡有損者間有之故教人不可不擇也凡教人者示之以謙恭為先苟其為人也有小人之性則雖子弟之輩不可欲博學多才恐長

其教慢也唯教之以孝弟遜順諭之以忠信不欺
道之以謙恭而不侮人勸之以儉約而不奪人威
之以天道福善禍淫之說而欲使彼遠罪遷善而
已荀子曰非其人而教之齊盜糧藉賊兵也獨不
知李斯韓非哉可以爲戒

孔子曰民可使由之不可使知之愚謂可使由之者
今行義理之所當然也不可使知之者不能使知
其所以然也聖人豈不欲使天下之人咸知道乎
然以其勢必不可得也此以其稟性之上下而言
不可可也若以居位之上下言其不可可則古人

小學之教自王宮國都以及閭巷皆有之故自天
子以下至于庶人之子弟無貴賤無智愚皆得入
而學之教之以孝弟忠信之道禮義廉耻之則與
洒掃應對六藝之文故天下之人無不學其所學
皆是民生日用彝倫之法而切于身之事雖庸輩
易知易行是民可使由之也如大學之教是治國
乎天下之學唯王宮國都有之而其他如鄉閭族
黨雖人民衆多之地無之蓋天下億兆之民不能
使之咸入大學而教之學之其學之者唯天子諸
侯卿大夫元士之適子及凡民之俊秀者而已是

民不可使知之也

素問曰寒者熱之熱者寒之微者逆之甚者從之又曰逆者正治從者反治愚謂病之微也寒者熱之熱者寒之是微者逆之也此爲正治病之甚也寒者涼之熱者溫之是甚者從之也此爲反治蓋病之甚者正治則杆格而不入故從之而反治竊謂諫入之道亦當如此其蔽淺者可以法語之言是直諫也猶病之微者逆之而正治其蔽深者可以巽與之言是諷諫也猶病之甚者從之而反治也知二者不可妄施而各從其宜是可謂善道也

程子曰凡人避嫌者皆內不足也如避嫌事賢者且不爲况聖人乎篤信謂程子之言以避嫌則有害於義者言之益見義而必爲者不畏嫌疑也避嫌有害於義者如漢文帝以后弟竇廣國賢有行欲相之曰恐天下以吾私廣國久念爲不可之類是也文帝之避嫌也雖與私外戚者不同然唯畏人之疑而不以至公舉之是亦私意而已後有以避嫌爲善者禮曰嫂叔不通問非祭非喪不相授器且如古詩謂瓜田不納履李下不正冠是皆言不可居嫌疑之際也如晉陳壽居喪而有病使婢丸

藥之事亦可以為戒豈可以避嫌藥乎為不可乎
情慾之萌其初甚微故制之也易後來陷溺之久雖
知其不可而不能克之故不制之小則難奈其大
古語曰兩葉不除將用斧柯豈不然乎然則人之
所好其始不可不察

自賢自是者行有不得不知反求于己唯務責於人
而已是小人之情狀也故曰責己而不責人者君
子也責人而不責己者小人也豈啻君子小人之所
由分而已哉雖國之興亡治亂亦繫于此左傳臧文仲
曰禹湯罪已其興也勃焉桀紂罪人其亡也忽焉

人之所好其勢不兩立此重則彼輕故古人曰楚劍
利而倡優拙又曰不專一則不能直遂故為學者
欲專一于道義而用志不分

譽者或過其實毀者或損其真此衆人所毀譽之常
情也况小人奴婢之毀譽或因有私昵舊恩或因
有私怨宿對槩皆自私意所發而不足以為信耳
大率聞毀譽而精察不迷眩者可謂明也

曾子曰尊其所聞則高明行其所知則光大竊謂尊
信其所既聞以是推類窮理則其知識將高明篤
行其所既知以是自修日進則其德業將光大

無實而得者，可耻之甚也。雖偶然一時得之，終亦必亡而已矣。非所可喜也。

聖人陰陽合德，剛柔兼備，故仁義之德全矣。中人以下不能無偏性，故明于彼者暗于此，長乎此者短乎彼。中人以下之性，往往如此。天之生物，無全功，是自然之理也。治性之道，裁其所有，餘補其所不足，而欲無偏而已。

漢匡衡曰：治性之道，必審己之所有，餘而強其所不足，愚謂治性者，乃宋儒之所謂變化氣質也。匡衡之言，亦可以為治性之法。

海山學堂
學海書印

夫道一而已，故學焉者，貴純一。若行王道而雜霸術者，為伯道；非王道也。為儒而雜異術者，為異術；非儒也。學程朱而雜陸王者，為陸王之徒；非程朱之學也。行道誼而雜功利者，為功利；非道誼也。蓋雖清冽之水，苟有一點之污穢，不可吞也。

天地施恩于萬物，而不望其報；父母施恩于子孫，而不望其報。蓋天地父母本無意于求報，其恩所以廣大而無窮也。今施纖芥之恩於人，而人不報，則為念對，是誠可謂薄夫也。

程子曰：學者須先溫柔。溫柔則可以進學，竊謂溫柔。

是德之始德之接人也本自溫柔接人不溫柔是所以無德也故君子之對于人倫皆以溫柔為始只臨下之道須嚴威儼恪然其心本自須溫柔不可刻薄蓋溫柔嚴威道並行而不相悖也

做事制行苟當理則雖愚俗誹笑不可畏蓋世之毀譽往往不中理者多矣不足為憂喜也况世俗之所誹謗久而後定乎顧歲月奈何而已矣若淺智薄行之人一聞人之誹謗則畏縮而不奮所以不能成行也

日日行善而不休雖小善而不廢一日有十二時之

功一月有三十日之功一年有三百六十六日之功其積累之至高大不可測知須樂善而無倦古語曰塵積為山喻積小善而成大德也

天運而不已日月行而不往寒暑來往水流不息物生不窮是皆天道之流行道體之自然也故君子法之自彊不息自彊者循其自然之理也且能養生者動靜有時而不偏于安逸導氣而不閉塞循其元氣流行之自然而已足亦法于天行健而自彊不息也事務雖多不可急迫急迫則不能思慮周詳且動作草率而不過者少矣故凡事緩則得忙則失

學者須知其要而務守之所謂知其要者一言而盡
 矣殆非虛言矣蓋為學之要在立志心術之要在
 主忠信躬行之要在篤敬讀書之要在精熟進學
 之要在致知克己之要在勇猛免禍之要在慎言
 蓋知其要而守之則用力專一而得效多矣苟不
 知其要雖泛求之難為功故程子曰所守不約泛
 濫而無功

交際之間若有情意疎薄而曠闕於音問只當謝吾
 志之不厚不可却託于外事紛冗而偽飾於其疎
 畧是雖細事然文過自欺非忠信之道所以害心

術為大也可不戒乎古語云君子有過則謝以質
 小人有過則謝以文亦此意也

潛想流言之惑人也是古今之通患雖豪傑或不能
 免况其下者乎若夫惑小人之言而信讒發怒疏
 骨肉斥忠良不知孰甚焉家之衰亡國之危亂繫
 焉不可不畏省而察識之古諺曰不癡不聾不為
 家翁此乃智者之事

知人甚難唯明而公者能知人闇而私者不能知人
 衆人知識闇昧私意蔽固故闇者不能監察人之
 曲直邪正而妄信人之毀譽欺偽私者徇己之愛

憎喜怒而妄決人之賢否得失雖欲不誤而不可得也

天地之間淑者常少慝者常多是以君子常少小人常多且世間順適之事常少拂戾之事常多世態如此固不足為怪今之人一事不快于我心則怨懟於人是多欲之人不知世情物態愚之甚也朱子曰自家猶不能快自家意如何他人却盡快我意思謂人能體認此語則庶乎遠怨懟蓋制自家之心雖其機在我尚且難剗御而况於他人乎許魯齋亦曰以聖賢望人則無完人然則可以常人

望人庶幾無怨懟也

雖有忠信之人然有其心不正者蓋緣有喜怒哀惡之偏僻也可不自省察乎大學誠意之後復有正心之工夫以是也

人性之善也譬如地道之敏種也地道無不生於草木其所以不生者沙漠磽确之地而已然開墾培養則亦能生茂焉人性無不善其所以為不善者因頑愚而不開明也故學貴開發其聰明人之才有賢愚者猶地之有肥瘠上智猶膏腴之地不待培養而能生茂中人以下如瘠土須加培養之功

易觀象傳曰觀天之神道而四時不忒聖人以神道設教而天下服矣易曰齋戒以神其德又曰陰陽不測之謂神中庸曰鬼神之爲德其盛乎云云邵子曰人之心即天地之神人之自欺所以欺天地也不可戒乎朱子曰心者人之神明所以具衆理應萬事者也又曰心者神明之舍篤信謂聖賢說神明如此夫天地人心皆有神明不可得而揜祇在人之默知之而已

君子儒之所誦說小人儒之所誦說同是六經語孟也所誦者同而其得失不同損益異者果何也曰

聖經有心迹之異聖人之言行載而在六經四書是乃聖人之迹也其所以做言行者聖人之心也君子之爲學也誦聖人之跡求聖人之心而後隨其才性之長短與其用力之厚薄而得之故所得雖有大小淺深之異然學焉則必有益也小人之爲學也誦聖人之迹而不求於聖人之心爲學所以無益者由此也

孝經大夫孝章先言先王之法服次言先王之法言與德行孟子答曹交亦先服而後言行夫言行者人事之大者也然以服爲先何也蓋服者身之表

也接人則先見者也而後聽言觀行故以此爲言行之先魯語曰服心之文也左傳曰服之不衷身之災也愚謂心之所好身必服之觀服之邪正而其心術可知可不慎乎詩曰彼其之子不稱其服蓋服有貴賤老幼士俗之相稱與不相稱不相稱者是服之不衷也

或問雜念紛擾爲心術之害除之之方奈何曰心有主而專一則自無此患

君子教人以豫爲貴豫之道當於童蒙之時易曰蒙以養正聖之功也賈誼曰太子之善在於早教論

與選左右顏之推曰教兒於嬰孩誨婦於初來皆是豫之道也豫之道即小學之法也

古語曰幼成如天性習慣如自然誠哉是言也人只習善則爲善人習惡則爲惡人習之移人也大矣故孔子曰性相近也習相遠也凡學則須習習則熟熟則如自然所謂習與性成也

在物爲理處物爲義譬之飢人欲食之理在彼與食之宜在我如父宜愛敬之理在彼當愛敬之義在我是理義之辨也所以然者理也所當然者義也亦是此意

人不可無先見之明苟無先見之明則倚伏暗前算而不免多悔吾人之在世也譬如瞽者擿埴而行又曰殆哉然有先見之明亦是智者之事吾輩庸人不可及而已苟有臨事而懼好謀而成之志而用深思遠慮之功則雖無先見之明又以庶乎寡悔

宋儒以氣質之性天地之性分拆言之此為學者易曉也其實人無一性氣質之本然即是天地之性而已性者本是氣質之謂也朱子曰不公心之人不能讀書信哉斯言也蓋不公

心之人其心多偏邪雖力學讀書其所見不平正常徇一己之私主張之是以不能得正理所見多差所以不能讀書也

看書不要貪多只須要熟讀精思而體認道理是欲自得之也

孟子曰親親而仁民仁民而愛物二者仁愛之理一也然自有親疏故施之之道自有輕重如此是分殊也蓋理一者仁也分殊者義也義也者仁之所宜輕重也

衆人之為不善而將有禍不知悔其非改其過特負

禱神媚佛而欲遠罪難乎免禍也此因暗禍福報應之理也

教人之道雖子弟卑幼之輩愚不肖不宜乎忿厲激怒唯嚴肅從容丁寧告戒循循誘引是所以能養成人材也故曰中也養不中才也養不才詩曰載色載笑匪怒伊教是乃教人之道宜如此若忿怒罵詈則人亦拂戾扞格而不容教所以不能教育人材也

大凡觀古人之書聞今人之言而知其義理之當否有二證考諸聖經而不謬一也比諸天地萬物之

理而不悖二也鑒諸我心之良知而無疑三也能以此三者試義理之當否庶乎不違矣三者之中考諸聖經者乃其本也

不尊德性而徇物慾譬如以階侯之玉彈干仞之雀方見不知其輕重貴賤愚之甚也

常人不_レ知吾性本是天地之性而自爲_下愚之趣却把吾心處汚賤下流之地了可謂穢天之明媿人之紀乃自暴自棄之甚也

天道流行運而不息者何以見之日月之往來四時之推移雨露之施滋川流而不竭草木之發生暢

茂是皆可以見天地之化，靜觀則萬物皆有生意。疇知其妙哉！知之者乃知道也。

孔顏之樂，周程之所引而不發，朱子之所不盡言也。蓋博文約禮之工夫成熟，而人欲淨盡，天理流行，則其樂初可知而已矣。非吾儕庸輩之所以想像億度而可得其彷彿也。然而夫子屢言樂，是必有不以也。然則雖衆人又必不可無樂而樂之，有違而已矣。且夫草木之發生，禽獸之和鳴，鳶之飛，魚之躍，亦是草木禽獸蟲魚之所爲樂也。然則雖衆人亦不可無其樂。其所以樂之意味，多寡之分數，雖與

孔顏之樂不可同日而語。然人物之性中自然有生理，此樂之所生。故雖衆人不能無此樂。如衆人亦克已復禮之功，一分進，則有一分之樂。所樂之多少，隨乎人欲去處，天理流行之分限而已。若人而不知此樂，則貪于酒食，溺于聲色，樂驕樂，樂佚遊，樂宴樂，凡百玩好皆足以蕩其心。至于放肆邪侈，無不爲而已。是因不知在我之樂也。然則孔顏固雖吾曹庸愚之非，所可尋。然人人皆有本然之樂，而在于心，是爲真樂。不可以比世俗之樂。故雖衆人亦須知有此樂而樂之。不然則陷溺于世俗

之樂而不知返，是小人之歸也。

孔顏之樂，非樂道，又非樂天理之謂。且非別有一物而樂之。若謂以道爲樂，則道與樂做一了。人心本天命之所在，天機常生生不息，故滿腔常欣欣和氣，其生意不息，隨處欣合和暢，是謂之樂。是人心裏自然所有之天性也。非獨孔顏有此樂，人皆有之。孔顏能勿喪耳。常人雖有之，爲私欲被間隔了，所以不能存此樂也。學者存養克己之功，熟而視聽言動無非禮，則日用動靜之際，天機流行發見，油然而生，如草木之有生意也。便是樂。既有此

樂，則日新而不息。至於不知足之蹈之，手之舞之，且如人之吟風弄月，詠歌舞蹈，以養其血脉，與天草木之發生，禽鳥之和鳴，鳶飛魚躍，皆是同一天機自然之生理，而無非樂也。

記曰：君子樂得其道，蓋得其道者，惟心無私欲而事當理之謂。不得其道，則反此。得其道，則隨處而樂。所謂君子無入而不自得焉也。然則雖處逆境而不失其和樂之心，况於順境乎？立則樂乎？立行則樂乎？行臥則樂乎？臥飲食則樂乎？飲食對客則樂乎？空觀山水則樂乎？山水如此，則無所往而不樂。

也非樂窮樂樂伏遊蓋自有其樂爾

人之心有本然之樂則目之所睹耳之所聽身之所觸風花雪月四時之佳興山川之美景鳥獸之和鳴草木之榮萃凡滿天地之間者皆足以資吾本然之樂是以舉天下之物皆可以爲悅吾心養吾身之具其富饒也終身不可用盡惟非藉外物之羨以爲吾樂外物之羨來觸而資吾本然之樂而已苟無本然之樂則外物之奉我身誘我欲者適足以爲累吾心傷吾身之具而已何足以爲樂哉君子之心有本然之樂是人心之所固有天性之自

然也如花月之悅目聲樂之娛耳之類是特藉外物而助吾之樂也非專以是爲樂之主苟心失本然之樂而徒欲以身外之尤物爲悅樂是以外物爲樂之主所以惑而不樂非君子之所爲樂也

樂是人心之天機雖常人亦皆有之豈唯人心有此樂而已哉如草木之發生禽蟲之和鳴亦是天機之發動可以爲其樂唯人爲氣稟蔽錮物欲間隔失此樂者舉世皆然人情無不欲喜樂然衆人不能識人心本自有此樂惟中無所得則不能不藉外物以求樂是以聲色臭味之欲無所不至然不

能以道制欲則惑而不樂故其初雖耽樂然其終不能無憂患衆人之所以惑而不樂也

孔顏之樂與吟風弄月之樂爲不同者何也蓋以孔顏之樂不在乎外也然吟風弄月之樂雖在外亦可以資吾之樂非內外不相干涉者也

君子之心人欲淨盡天理流行處常處變從容洒落故雖入貧賤患難之中不改其樂又况於富貴順適之時乎是所謂君子無入而不自得焉也蓋君子之心固有本然之樂而無一物之累然後萬物皆可以爲樂此非待外物而後爲樂物至于前而

皆足以資吾樂也內焉則詩書禮樂飲食衣服外焉則山水風月花木蟲魚亦皆可以資吾樂顧所資其樂無窮而其所樂亦無盡是豈可不自得乎君子之所樂如此則豈知足之蹈之乎之舞之哉

作善自天祐之而降百祥作不善自天害之而降百殃故作善是百福來集之基勝于誦神佛何止百倍君子爲道衆人爲福衆人亦須知天道福善禍淫之理而畏天奉若避災求祥此則古今華夷之往迹歷歷可見矣是天道之至教必然之理可信可畏而不可疑

凡居家立朝獨處接人皆當隨處逐件點檢其言行須自省察其所言所行之善惡而慎其獨不可一事自欺而放過必如此而行修言踐之功可進學者以就平實為先務須遠志務時敏且可以浮躁淺露自矜自是為禁戒

蔣子方曰學者如牛毛成者如麟角篤信謂是言學者多而成者少也成者之所以少何耶蓋因學之不正與不專一是識見不明故不知為學之道也以訓誥章句之習欲知道者所謂以若所為求若所欲猶緣木而求魚也吾輩自妙年為學亦如此也

老初知今是而昨非可謂晚也

慎思錄卷之一終

